

文獻叢編



文獻叢編



文獻叢編第十九輯目錄

盛京宮殿全圖

圓明園圖

清同治朝太監安得海案 未完

軍機處章京值房遺失太平天國金印案 完

雍正朝關稅史料 續十八輯已完


宣統三年電報檔選錄 續十八輯已完


圓明園史料 續十八輯未完




盛京宮殿全圖


藏清軍機處檔案內
縱 60 cm, 橫 65 cm,





圓明園圖 藏清內務府檔案中 縱 58 cm, 橫 89 cm





清同治朝太監安得海案

案同治八年秋太監安得海乘樓船緣運河南下自稱奉旨差遣所過招納權賄地方官吏無敢發者至山東境內巡撫丁寶楨使緹騎捕之入奏而正以法丁氏此舉當時極爲人所稱述原當同治八年之際穆宗尙親政兩宮垂簾而慈禧后尤喜信任奄人故安得海頗用事妄干朝政結怨廷臣軍機處領袖恭親王奕訢尤銜之或謂丁寶楨之殺安得海爲奕訢密諭使之者不爲無因也關係此案記載屢見私人筆記近以整理內務府檔案檢得丁寶楨咨送內務府關係此案之奏稿諭旨口供等件茲刊布於左

山東巡撫丁寶楨鈔錄奏摺咨送內務府文

同治八年八月初五日

太子少保頭品頂戴兵部侍郎兼都察院右副都御史巡撫山東等處地方督理營田兼提督銜節制全省軍務兼理鹽政丁爲咨明事竊照本部院于同治八年七月二十九日由驛恭摺具奏太監自稱奉旨差遣招搖煽惑真僞不辨現飭查拿審辦一摺除俟奉旨另文恭錄咨明外合先抄奏咨明爲此合咨貴

府煩請查照施行須至咨者右咨內務府同治八年八月初五日

山東巡撫丁寶楨奏報太監招搖煽惑現飭查拿審辦摺

同治八年七月二十九日

奏爲太監自稱奉旨差遣招搖煽惑真僞不辨現飭查拿審辦恭摺由驛奏聞仰祈聖鑒事竊臣接據德州知州趙新稟稱本年七月二十日訪聞有北來大太平船二隻小船數隻駛入州境儀衛炫赫自稱欽差該州因無傳牌勘合又未奉文行知形跡可疑隨即派人密訪據稱係安姓太監坐船旗上大書奉旨欽差採辦龍袍字樣兩旗上又有一小旗上畫一日形一三足鳥船之兩傍俱有龍鳳旗幟並聞船上設有龍衣一襲所帶之人舉動桀驁且有女樂成隊品竹調絲兩岸觀者如堵二十一日船至橋口風聞本日是其生辰所帶男女多人均向龍衣羅拜民間頗爲震駭該州正在馳往查詢而該船業已揚帆出境南去現已飛移下站及鄰封跟蹤查訪稟情核辦等情臣接閱之下不勝駭異伏思我朝列聖相承二百餘年從不准宦官與外人交結亦未有差派太監赴各省之事况龍袍係御用之衣自有織造謹製倘必應採辦但須一紙明諭該

織造等立即敬謹遵行何用太監遠涉糜費且我皇太后皇上崇尚節儉普天
欽仰斷不須太監出外採辦卽或實有其事亦必有明降諭旨並部文傳知到
臣卽該太監往返照例應有傳牌勘合亦決不能聽其任意遊行漫無稽考尤
可異者龍鳳旗幟係御用禁物若果係太監在內廷供使自知禮法何敢違制
妄用至其出差攜帶女樂尤屬不成體制似此顯然招搖煽惑駭人聽聞所關
非淺現尙無騷擾撞騙之事而或係假冒差使或係捏詞私出真僞不辨臣職
守地方不得不截拿審辦以昭慎重現已密飭署東昌府知府程繩武暨署濟
甯州知州王錫麟一體跟蹤查拏解省由臣親審請旨遵行所有太監自稱奉
旨欽差採辦龍袍招搖煽惑真僞莫辨現飭查拿審辦緣由謹恭摺先行由驛
四百里奏聞伏乞皇太后皇上聖鑒訓示謹奏同治八年七月二十九日

山東巡撫丁寶楨鈔錄奏摺咨送內務府文

同治八年八月初九日

太子少保頭品頂戴兵部侍郎兼都察院右副都御史巡撫山東等處地方督
理營田兼提督銜節制全省軍務兼理鹽政丁爲咨明事竊照本部院于同治

八年八月初七日由驛恭摺具奏拿獲私逃出京招搖煽惑之太監確查無據業已遵旨正法並現在分別查辦隨從人等一摺除俟奉旨另文恭錄咨明外合先抄奏咨明爲此合咨貴府煩請查照施行須至咨者計粘抄原奏一紙右咨內務府同治八年捌月初九日

山東巡撫丁寶楨奏遵旨將招搖煽惑之太監正法並查辦隨從人等摺

同治八年八月初七日

奏爲拿獲沿途招搖煽惑之太監確查無據遵旨正法並現在分別查辦隨從人等恭摺由驛覆奏仰祈聖鑒事竊臣前據德州稟報有安姓太監自稱奉旨差遣採辦龍袍乘坐船隻擅用違禁旂幟並攜帶女樂羅拜龍衣沿途招搖煽惑等情一面先行奏聞卽密飭沿途各州縣一體截拏在案臣拜摺後陸續接據臨清東昌東阿甯陽等處先後稟報該太監船隻由德州駛至臨清之南灣地方先期卽有前站官雇就大小車二十餘輛由直隸故城縣屬鄭家口旱路而來至彼守候船至南灣卽換車改行陸路所帶女樂因車行不能多帶隨開

銷遣去此外僅帶婦女五人其隨從約有三十餘名均似鑣手之類由臨清東昌至汶上寧陽東平東阿一帶行走勢甚迅疾形跡可疑沿途居民頗爲驚駭等情臣因該太監隨從人衆又多係鑣手慮恐不服查拏復又密飭各路巡緝武員酌帶小隊馳赴前途與地方官相機捕拏旋據署泰安縣知縣何毓福稟報該太監由寧陽折回于八月初二日行抵該縣南關經該縣將其誘獲並將隨從男女人等暨車輛一併設法截留先將該太監暨跟隨三人解送來省等情臣隨提該太監至所事親行密詢據稱姓安名得海直隸青縣人年二十六歲向充太監詰以因何出外據稱奉旨差遣採辦龍袍復詰以旣係奉差何以並無諭旨及傳牌勘合又何以攜帶婦女妄用禁物必屬假冒何能狡飾該太監始猶強辯繼經臣以毫無憑據及不應一路招搖震驚地方嚴詰形色惶恐俯首無詞自稱該死臣復搜查其隨身所帶物件於貼身包袋內搜出紙包一個內有紙片二件均係干預地方公事詢係受人請託是其假冒招搖確切無疑臣復將其跟隨三人查詢據供一名陳玉祥一名李平安一名黃石魁據稱

均係跟隨安得海服役本年七月內安得海聲稱奉旨採辦龍袍帶領伊等起程實不知其真僞由天津坐船攜帶婦女多人同行至臨清地方復又換車起旱行至泰安卽被拏獲各等語臣復將其隨帶衣廂開視內有龍衣一領並翡翠朝珠一掛餘均係常用物件隨卽封固并將該太監等飭交歷城縣嚴加看管候旨遵辦茲于初六日亥刻承准軍機大臣字寄欽奉密諭該太監擅離遠出並有種種不法情事若不從嚴懲辦何以肅官禁而儆效尤著丁迅速派委幹員于所屬地方將六品藍翎安姓太監嚴密查拿今隨從人等指證確實毋庸審訊卽行就地正法不准任其狡飾如該太監聞風折回直境卽著曾飭屬一體嚴拿正法倘有疎縱惟該督撫是問其隨從人等有迹近匪類者並著嚴拿分別懲辦毋庸再行請旨等因欽此臣跪讀之下仰見聖明獨斷欽佩難名當以安得海前經臣親查確實隨於初七日卽欽遵諭旨飭委兼署臬司潘爵臣標中軍參將緒承督同府縣將安得海卽行正法至泰安縣截留之隨從人等並婦女車輛現已札飭一併解省俟提到日與現在解省解之親隨陳玉祥

等分別辦理其衣物等項飭發藩庫存貯至龍衣一件並翡翠朝珠一掛是否私造抑係竊出不辨真僞應另派弁親賞同搜出之紙片二件一並咨送軍機處查核以昭慎重所有拿獲沿途招搖煽惑之太監查驗確實業已遵旨就地正法並現在分別查辦隨從人等緣由恭摺由驛覆奏伏乞皇太后皇上聖鑒謹奏

山東巡撫丁寶楨鈔錄廷寄咨送內務府文

同治八年八月十五日

太子少保頭品頂戴兵部侍郎兼都察院右副都御史巡撫山東等處地方督理營田兼提督銜節制全省軍務兼理鹽政丁爲恭錄咨明事竊照同治八年八月十三日准兵部火票遞到軍機大臣字寄同治八年八月十一日奉上諭二道承准此擬合恭錄咨明爲此合咨貴府煩請欽遵查照施行須至咨者計恭錄上諭二道右咨內務府同治八年八月十五日

軍機處寄山東巡撫丁寶楨上諭

同治八年八月十一日

軍機大臣字寄山東巡撫丁同治八年八月十一日奉上諭丁奏拿獲招搖煽

惑之太監遵旨正法並分別查辦隨從人等一摺已明降諭旨宣示矣安德海既經正法其隨從之陳玉祥李平安二名亦係太監均著卽行絞決此外尙有太監幾人著丁於訊明後一併絞決以儆效尤其餘隨從人等迹近匪類者卽懷遵前旨分別懲辦至黃石魁一名係何人役摺內所稱前站官究係何官抑係冒充并著訊明辦理安德海衣物等項毋庸存儲藩庫卽由該撫派員解交內務府查收將此由六百里諭令知之欽此遵旨寄信前來同治八年八月十一日內閣奉上諭本月初三日丁奏據德州知州趙新稟稱有安姓太監乘坐大船捏稱欽差織辦龍衣船旁插有龍鳳旗幟攜帶男女多人沿途招搖煽惑居民驚駭等情當經諭令直隸山東江蘇各督撫派員查拿卽行正法並據丁奏已于泰安縣地方將該犯安得海拿獲遵旨正法其隨從人等本日已諭令丁分別嚴行懲辦我朝家法相承整飭宦寺有犯必懲網紀至嚴每遇有在外招搖生事者無不立治其罪乃該太監安得海竟敢如此胆大妄爲種種不法實屬罪有應得經此次嚴懲後各太監自當益知儆懼仍着總管內務府大臣

嚴飭總管太監等嗣後務將所管太監嚴加約束俾各勤慎當差如有不安本分出外滋事者除將本犯照例治罪外定將該管太監一併懲辦並通諭直省各督撫嚴飭所屬遇有太監冒稱奉差等事無論已未犯法立即鎖拿奏明懲治毋稍寬縱欽此

總管內務府奏將安得海衣物原封交進驛馬等應交何處請旨遵行摺總管內務府謹奏爲奏聞請旨事本月十八日據山東巡撫丁寶楨派委候補直隸州知州文敬候補知縣麟盛將太監安得海衣物等件封固妥協解交臣衙門查收臣等謹將解到箱支包篋共計三十九號原封交進其解到之驛二十二頭馬十七匹驢一頭車六輛應交何處請旨遵行並將該撫送到印冊二本一併呈覽爲此謹奏請旨

山東撫部院咨送查出太監安得海案內金銀珠玉衣物等件清冊

山東撫提部院爲咨送事今將查出太監安得海等案內金銀珠玉衣物等件逐細點明造具清冊咨送查核施行須至冊者